

Dudwiller – mei Heimad

Gonz frieher, vor ewisch longer Zeid,
do hat´s Berje, Dääler unn viel Wald noch genn;
aach Fliss unn See´e weit unn breit;
unn die Mensche hann erschd noch gesucht no´me Hemm.

Do ware paar Schlaue, die honn gleich gesiehn,
es Sulzbachdaal leit geschitzt unn scheen.
Hie duun mir baue, doo ziehe mir hin!
Om Onfang wares nur wenische gewähn.

Im 5. Johrhunnert noh Christus war´s donn
´wie die Fronke ins Land rinn sinn kumm.
Do war enner debei - Dudo, e Monn,
das war e Schlitzohr - unn gar nit dumm.

Dem fränkische Herr hat´s gudd do gefall:
"Hie bleib isch, e Hof bau isch hinn.
Unn die Bauere in da Siedlung solle all
von jetzt ohn mei Unnerdahne sinn.

Unn heische soll de Ort noh mir - Dudo!"
So hat awwer aach nur er gemennt,
denn ball sinn die Reemer durch´s Lond gezoh.
Unn die hann´s Ärtsche uff ladeinisch "villare" genennt.

Sie honn donn de Nome zesamme geschrieb -
wie´s domols scheints so ieblich war.
Vunn dem Dudovillare is später Dudweiler geblieb,
unser Dudweiler, bei Saabrigge an da Saar.

Uff äämol sinn so Schlauberjer dehinna kumm,
dass das Lond nit nur fruchtbar is allään,
denn inn unn umm denne Ort drumerumm
hat´s Ohnzeiche fa Boddeschätz genn.

Kohle, Eise, Alaun, Kalk, Kiss, Sond , Stään
unn was sunschd noch alles im Bodde war drinn.
Dem entschpreschend ware aach die Berufe gewähn.
Das is heit noch an de Schdroßenome ze siehn.

Jetzt war die Induschdrie erschloss.
Es Därfche war e Dorf schunn woor.
Werge unn Gruwe sinn aus em Boddem geschoss.
De Ort is gewachs vunn Jahr ze Jahr.

Awwer - nur gudde Zeide, das gebbt´s jo nit.
E harder Exisdenzkampf ging los.
Die Owwere honn um die Herrschaft geschdridd.
Im Middeldalder war die Not aarisch groß.

Im 30-jährische Kriesch, so stett´s geschrieb,
honn se Dudwiller gonz bees zugerischd.
Zwei Unnerdahne sinn iwwerisch geblieb;
alle onnere ware dood odda sinn geflischd.

Awwer immer widda, mit Geduld unn Geschick,
honn die Mensche vunn vorre ohngefong.
Unn honn dort im Dorf vasucht ihr Glick.
So is dad Jahrzehnde, Jahrhunnerde gong.

Die Zeit hat Lond unn Leid gepräscht.
Mensche wurde´s meh, de Platz wurd knapp.
Do honn se hin unn her erwäschd
unn beschdimmd: E Dääl vunn de Wälder muss ab!

Die Berje sinn kahl geholzt wor ringsrum.
Dort war´s jetzt kahl, naggisch unn groh.
So iss "Kaltnaggisch" zu seim Nome kumm.
- Bis widda alles vabaut war, so noh unn noh.

Wohnheiser, e Rathaus, Kirsche -wunnerbar -,
Schule, Bohnhof unn noch onnere Gebeide,
Brunne, Denkmäler, e Kloschder sogar;
ball war´s Ortsbild e Auweide.

Doch nit nur, was Menschehänn honn fabriziert,
aach die Nadur, die Zeide honn dozu beigedrah,
dass Leid wie Goethe honn bei uns gaschdiert,
weil e brennender Bersch jo sehenswert war.

Grafé unn Firschde honn Dudwiller beehrt -
do gebbt´s doch nix meh ze schwätze.
Pollidiger unn Staatsmänner sinn bei uns vakehrt.
So war´s frieher unn so isses noch jetze.

Mit da Zeid, bis zu unserm Jahrhunnerd,
war Dudwiller es greeschde Dorf uff da Welt.
Alles hat sich aarisch do driwwer gewunnerd.
Mir honn immerhin 30.000 Innwohner gezählt.

30.000 Seele - honn se frieher gesaht,
unn immer noch e Dorf, das is nit normal!



Das is jo schunn e ausgewachseni Schdadt,
mit so´rer groß Innwohnerzahl.

Bis 1962 hat´s Mammutdorf exischdiert.
Donn honn se uns e Urkund valieh.
Jetzt honn mir die Bezeischnung "Schdadt" gefiehr -
unn ware die jingschd Schdadt im Umkreis hie.

Unn noch e großes Ereischnis hat sei Schadde geworf,
dass mir´s miterläbt honn, war scheen:
1.000 Jahr war das zur Schdadt geworrene Dorf
laut Urkunde 1977 gewähn.

Onn Hond vunn de Funde wääß ma zwar -
awwer was frohe mir dodenoh -
dass die Ohnsiedlung schunn viel viel älder war.
Die Hauptsach is: Unser Dudwiller iss doh.

Es Dorf war scheen, scheen is aach die Schdadt.
Ma fleeschd hie Gesong, Schpiel, Spaß unn Sport.
Wer se noch nit kennt, is hiemit gelad.
Unser Gaschdfreinlichkääd is schprichwertlich dort.

Unn wenn misch ääner frohe dääd:
"Wo mäschde am liebschde sinn?"
Die Antwort, die isch gääd, die wär:
"Dehemm, in Dudwiller, denn do geheer isch hin!"

